

BUSINÀ 86°

2010/2011

(Bellinaso Fabio – Raiteri Pier Luigi)

Buna sira, buna sira cari siuri... E ben c'mè c'la va? A son pròpi cuntent ad vigvi. E cun ist, i son utòntases ani c'a fuma 'sta Divòta Cumedia. Ist ani a suma stacc pròpi furtünà, perchè a l'ùltim mument i m'hòn dacc el voto 'd fiducia ònche a noi, acsé a j'uma pudì pàrti!

Oh, ma uarda quòncch ch'i séi chi stasira: per forza! Is di frà, a l'è l'ùnic teater restà druèrt an sità! Stè tranquil che chi ad pùvi d'amianto u na j'è mea: stè ammachi atént suta al cadréghi ad nént spurchèvi i pè, perchè i séi che chi i giru sémper el bëci e i lasu di ricurden!

A noi um pias reji, ma a péns c'u mbsògna avei in teater a Lisòndria e auru ma ònche ricurdè cui ch'i travaju an teater e adès i son a cà, preocupà perchè i sòn nént ancora quòndi ch'i pudròn turna c'mensipiè a travajè e aurisa fèj in bèl aplauso ansèma a voi...

Sé, perchè cun 'sta crisi pèrdi u travaj a l'è el prublema pü gros c'u j'è. Per furteina u j'è ònche cui che, pròpi ant is periodo, i riesu a sbrujesla ben. L'ater dì, tònt c'a j'era an gir, a j'hó sénti du madamen ch'i ciaciavuvu e jëina la diva ch'l'era preocupaia per só fiò c'u s'è laureà, ma a l'è tréi ani c'u sta a cà, perchè u trova nénta da travajè; e l'atra a i dsiva: "Uarda, me anveci a son pròpi furtinaia, perchè mè fiò, ch'l'a du laurei, a l'ha trovà finalment in travaj d'asident, ater che la crisi: pénsa c'l'avrà pü ad mila persouni a suta e quòndi ch'el parla lü, i stòn tücc citu, tücc a u só post". L'atra ai uarda cun doi oggi acsé e ai ciama: "Ma dim an pò', ma che travaj ch'el fa?". "U taja l'erba au simite-ri"!

Sé, perchè ònche chi a Lisòndria u travaj u smeja bèle ferm. Ammachi n'afari us bugia, la giostra di cavalen an Piasa dla Libertà: ma a vot vighi che i cavalen i son viv! Perchè la giostra l'era partia an Piasèta, pò' a s'è spustaia dadnòn al Munisipi, pó' dadnòn a la Bònca d'Italia e ist ani a l'è rivaia dadnòn al Posti: acsé magari per in atr ani i la spedisu e us na parla pü!

Ammachi an sla viabilità i travaji is fermu mai. Pensè per esempi al Pont 'd la Sitadéla. C'mè ch'i disi? Ch'i j'hòn ancora facc gnénte? Ma s'u sarà in ani ch'i j'hòn бүтà in cartel cun na futugrafia grònda c'mé Piasa Ratas; a l'è che i sòn nénta ancora quòndi ch'il gavarròn! Ma i j'ei vist se ch'i j'hòn scricc ansüma? 'Guarda Oltre': per forza, an mès u j'è niente! Pitost i pudivu scrivi: 'Uarda ben'... sé, andò 't бүти i pé, però! 'Che se 't stai nént atént, at póri caschè zü.

E an pü, suta i j'hòn scricc: 'Il Ponte che unisce'; uarda che i voru pròpi pièm an gir. Ma uarda s'i j'avu da trè zü cul pont pròpi adès ch'i j'hòn druèrt la

Sitadéla: u smejia ch'i l'abu facc aposta. Adès i urganisu in mügg ad spetacul: el cursi di cavà, la müsica, la féra... A l'è che, s'u 't ven voja d'andè, at devi fè in gir d'asident! Pensè che na duminica as suma dacc apuntament e a l'è rivà prùma me chisen da Asti che me da Via Vochieri! A menu che i j'abu nént ant la ment cuc cosa ad divers. Sé, perchè i j'ei vist cul cartel gròs an sla rutonda prùma del Pont Tiziano? C'mè c'u dis? 'Il ponte nasce sotto una buona stella'! E u j'è disignà la cometa di Re Magi: magari el pròsim ani, im fòn traversè Tani coi camel!

Per furtèina ch'i j'hòn lasà lé i semafori ch'i cuntinuu a funsiunè. I j'hòn dicc ch'i l'hòn facc perchè se di no el machini i j'andavu tròp fòrt. Ma la verità a l'è ch'i j'hòn pensà che, se jèn a l'ha decis ad trè an Tani, el pó' pasè ad cursa e 'l va nént suta a na machina.

Uardè però che a l'uma meja ancora rangiaja: ma s'a pens che el prüm prugèt del pont a l'è nént partì perchè a l'era tròp long, e a l'andava a finì andrenta a la Sitadéla, e che adès la tangensial i riesu nént a finila perchè ui na mòncia sémp in tòc, ma a digh! S'i scambiavu i prugetista, a st'ura a j'eru nént a post cun tücc doi?

U j'è da dì che lé dauvsen i j'hòn facc in'atra Rutonda, dauvsen al palazzetto: e cun isa, ui manca pòc per rivè a sént! A l'è che i l'hòn facc an sla cürva e ant na manera che se 't rivi an machina an pò' decis, at póri sèrni: o 't vai a fè el bagn an Tani o 't fai in canestro da trei poncc!

Speruma che ònche lé, per andè pü piòn, i bütu la Zona 30: ònche se i devu spieghèmi se ch'el vó dì la Zona 30? Che quòndi 't ei a pé o an biciclèta, at devi andè a 30 a l'ura per nént fèt aruitè? Anlura at devi esi ben alenà! El vó dì che per alenevi, i póri pruvè el biciclèti che el Cumèn a l'ha turna bütà an gir. Uardè ch'i j'hòn sèrni pròpi el mument giüst per tirèi fora! A nuvember! Acsé pó' a l'ha c'mensà a pióvi e fiuchè e per adès i j'armanu bèle fèrmi: speruma che ònche sta vòta i venu nénta rüsnéti e ch'i devu turna trèi veja dal frè! O forse i speciù ij incentivi an si muturen per cambiej!

Stavòta, s'i venu da bon rüsnéti, a l'è la vòta bouna che u noster Séndich us sagréina da bon, c'mè c'l'è sucès l'ani pasà per el Festival ad Sanremo. Lü l'ava ciamà ad fè la gara cun l'inno di Alessandria, però i trovavu nént la categoria giüsta per fèl entrè: cun i big, no, ansèma al nóvi prupòsti, gnòncia a parlèni. Anlura i j'hòn facc là categoria suta al metro e sesònta, ma pó' an final a l'è andacc Pupo e lü u s'è anrabià da mat, e ura d'andè a crumpè el ròsi, pitòst che andè an Riviera, lü l'è andacc a crumpèi an Moldavia! A l'ha dicc che acsè i resistu fin a la galaverna!

L'auvriva andè an Russia, ma pó' u j'è surtì fora u scandalo ad Wikileaks, e lü a l'ha nént auvsì fè anrabiè Berlusconi andònda da u so amis Putin a crumpè del ròsi! Perchè Berlusconi, ònche lü, cun el quistion internasiunal u sa pü c'mé sbrujela. Per esempi, cun Mubarak c'u j'ha telefonà per savei se c'la fava

so anvuda Ruby a cà soua ad Arcore, e lü povr òmi u sava nént se dì!
Perchè i noster pulitic i son fort, i sòn mai gnénte ad cul c'ui capita, o forse i sòn mai gnente ad gnente! Scajola, povr'omi, u stava ant ina cà, ma u sava nénta ch'i l'eisu regalaja; e u s'è sagrinà, perchè u sava nénta c'mé fè a ringrasièli is benefatur, perchè u sava pròpi nént chi ch'l'era. U j'è stacc ònche in ater c'u 'l sava nénta d'avéi crumpà in alòg a Montecarlo e d'aveili pagà menu che ant j Ort! Ònche Fini u s'è anrabià: sé, perchè u 'l sava nénta ch'l'ava spendì pü tònt lü per regalej la chiseina, che so chignà per tüt la cà!
Per nént parlè ad Casini e Rutelli, tüta gént an gòmba, ma senza sprint: e desà ch'i savu nénta c'mé fè el sorpasso a Berlusconi, i j'hòn ciamà jën c'us n'antend: Montezemolo, el President 'd la Ferrari!

E antònt Bersani e Di Pietro i j'hòn capì che i sòn nénta c'mé fè l'upusion e i j'hòn decis ad piantè lè cun la pulitica e i son andacc turna a stüdiè: sé! ansüma ai cup cun j'universitari! A l'è ch'i savu nénta che lè ansüma i pudivu truvè in Pesce d'Aprile: el Trota! Perchè Bossi c'u sava pü c'mé fèj fè la maturità a so fiò, a l'ha decis ad mandèli diretament a l'Università!

Me anveci a son pròpri curius ad savei che rasa ad dutur ui pó amni fora da 'sti student ch'i stüdiu nénta. Sé, perchè s'et stai da sénti i dutur, 't la róngi pü. It disu che tücc i dì, per stè ben, at devi piè n'Aspirina cun in bicier ad ven rus contra l'infart, jën ad ven biònc per u sistema nervus e na bira per la digestion: me um a smejia che se 't pei tüt ansèma, pó' 't ei bèle ciuc, acsé at capisi pü gnente e s'ut ven cuc cosa, 't at na rendi nénta chënt.

E pó' it disu c'at devi esi maghèr e fè la dieta. Acsé u 't capita c'mé a cul omi ch'el va da u dutur e ui dis: "Dutur, a so pü c'mé fè per amni pü magher; a j'hó zà pruvà an tüt el maneri, ma a son sémpèr gras medesim. E lü ui dis: "Monsü, me a j'hó na dieta infalibil: i devi mangè pòc, ma ancora pü ampurtònt a l'è ch'i devi caminè per vent chilometri au dì. Uardè, fuma acsé: as sentuma tra in meis e im disì s'i sei cuntent". El pasa in meis, e na bèla giurnà u souna u telefono e u dutur u rispond. Da l'atra part u sent jën c'ui dis: "Dutur a son mè. Iv na visi che in meis fa i m'ei cunsiglià la vostra dieta?". "Oh sé, c'am vis e anlura c'mé c'l'è andacia?". "Ah, l'è andacia pròpi ben, a j'hó zà perdi des chilu. U j'è ammachi in prublema: mè a j'hó facc i me vent chilometri au dì per in meis, però adès c'a son rivà a Ruma, chi c'l'è c'um ven a piè?!".

Va ben, adès a la piònt lé ad fè la predica, ònche perchè a l'è nénta el me mestè, e av present la me famija...